

**Ŋwa' wvu bokaŋ bofεε wvù Baul to
saŋεε ê kentaashe ke
Kol εn
Fiεε fi nu ê Ŋwa' wvu Kolεn wvu
bokaŋ bofεε wvun e**

Baul to saŋ ŋwa' wvu bokaŋ bofεε wvun fô kentaashe ke bonyii bo mbee le ke Kolεn e, ε è nu kefew kè bonɣew to nen'yεε etoo enteleŋ jo wvù bô kentaashe kedvu. Bonyii bo ê kentaashe kin e bomew to nu ε ne no keŋke mvunƙicen mvù temyi ekumε Baul. Geenεn, ε Baul saŋ no duŋci le wen koonke baay le bô bó etu diuw mwaan.

Ŋwa' wvun nu ε bvuu ε gen fwe ε no jemyi no Baul to lεke kentaashe kedvu le bó eyene can yibo keefi bonyii bo Klistu le bo Judea bô to nu yí ngew e. ε keba ke ŋwa' wvun e ke ejim nu ε Baul jemyi ekumε mwεem mvù duŋci le wen nu waa ntum Jisos Klistu wvu cεey. Wvù to jemyi njefo bonyii bomew bo Kolεn caan to nu ε ne bense bikuu bibole le è nu bowen boom bo ntum e bo Jisos e bo cεey, mum duu le ke Baul nu naa lo waa ntum Klistu wvu cεey ke.

Bikuu bi mwεem e ê ŋwa' wvun e

1:1-11 Keŋkewcε

1:12-7:16 Baul bô kentaashe ke bonyii bo mbee le ke Kolεn

8:1-9:15 Nnya keefi bonyii bo Klistu le bo Judea dvú

10:1-13:10 Ε Baul jeme εκυμε mwεεm mvù
duñci ε wen nu waa ntum Jisos Klistu wvu
cεεy

13:11-14 Kemεse

¹ Ε nu me wvù Baul, ε me nu waa ntum Klistu Jisos yî ηκοη wvù wvu Nyo' le. Ε nu bee waa bwee wesebeene wvù Timatio. Me nsaanke ηwa' wvun fô kentaashε ke bonyii bo mbee le bo Nyo' le bo Kolen, noo fô bonyii bò è nu bo Nyo' le bocii bo keba kè Akεya le kecii.

² Nyo' Icee wesebeene bô Tata Jisos Klistu ebuw ben, ebvuu enya ben bô mvuntelem mvù λεεtene.

Nyo' wvù λεεsee mvuntelem

³ Mbense enù fô Nyo' wvù è nu Nyo' wvu Tata wesebeene wvù Jisos Klistu, bvuu nu Ice le. Wvù nu Icee shen, nu Nyo' wvù λεεse mvuntelem mvu bonyii le yî mwεεm e mvunciim.

⁴ Ε nu wvù wvù ké no λεεsee mvuntelem mvuseεbeene yî bonγεw bosεεbeene le bocii wvu ε è nulo é beene emum ekee tεn keelεεsee mvuntelem mvu bonyii bomew e seke bó nu yî bonγεw e. Beene nulo ekee keelεεsee nonεn ε è nu bô nλεεse wvù Nyo' nu ε λεεse mvuseεbeene mvuntelem dvù.

⁵ Bese kee lo ε κε ληηλη no bonγεw bo Klistu le nu fô bese le baay, nu κε no Nyo' nu efele yî Klistu le λεεsee mvuntelem mvuseεse κε tεn baay.

⁶ Ε bese nu yî monlum e, tu è nu keelεεsee mvuntelem mvunεn noo keeboyse ben. Ε bó λεεse mvuntelem mvuseεse, tu è nu keege é mvuntelem

mvunen elɛtene, é ben ekuu shém enu nyεkeey yí bonɔew bò ben yene diɛwε no bese yene le.

⁷ Fiεε fi bese taale fwe kee εkumε ben nu ε kee fiεε nulo eshiw bese kee, njefo bese kee lo le no ben yene nɔew diɛwε bese le, nu ε ben tɛn nu ekɛnke mvuntelem mvù lɛtene diɛwε bese le.

⁸ Boom bo bwee wese le, kee bese gomte le ben enù sε ben kee kfuu nɔew wvù bese to wuε won wvù Esia le kee. Wvuwe nɔew to tɛmyi baay fele mvunɔay, ε bese no yene le kee è nulo é bese ebvuu eluɔ kee.

⁹ Yí kecεεy e, bese to kee le è nu kee wase kpwe fô bese le. Geenɛn fifin to kooyi nonɛn keege le fo bese eyeemè yí bikuu bisese le kee, le bese eyeemè ε è nu yí Nyo' le. E nu wvù wee wvù bvuuuse bonyii yí kpwe le.

¹⁰ Wvù wvudvu wvù to bvuseε bese yí kfuu wvuwe nɔew wvù è to yen'yi wase kpwe le, nu ε wvù nu ke emεy kee ebvuuuse. Bese nu ε geeε bvufee ε è nu yí ye le le wvù bee kee kee ebvuu ebvuuuse bese sekeci,

¹¹ no ben nu etomte bese bô bunle yene. Nonɛn é bonyii emum ke enyaa keyoone ê Nyo' fô bese le nje fiεε fi jee fi wvù nu ε buw bese dvù nje bunle bonyii nteen.

Fiεε fi to gee ε Baul sε kumɛn nkpawwε lene diew

¹² Fiεε nu dvù fi bese saale ye yí dvù le, ε fitele fisese tomte bese ekumε fí. Fí nu le, gee disese ê won jan, efey mvunciim fô ben e, nu di yuule, nu kecεεy no Nyo' gomte. Kee bese gee gee di bii bvufee bvuu

yî wonj wvun e κε. Bese gee bii ε è nu no Nyo' nu ε buw bese le bese egeè.

¹³ κε bese saanjke fιεε fimew fô ben e jεεy εfey fi è nulo é ben etanj ekiεε fí κε. Me ηkpwaake le ben nu ke etanj ekiεε fí ficii,

¹⁴ κε no ben nu ε kiεε wase bese keseen caan, wvu le é ke edioo enu diuu di Tata wesebeene wvù Jisos ε to, é ben esaale ye bô bese κε naa no bese saale ye bô ben.

¹⁵ No me nto ηkee naa fifin nonen, ε me mum no ηgomte keen'yaw nto ê ben e, wvu le ben ekenke σεw wem bokanj bofεε.

¹⁶ Me nto ηkaake le me nu ηke endioo enjene Masedonia enfey je jo ben, bô le me nu ηke endioo enkaase embvuu enfey je jo ben é ben efice me yî lene diem di Judea le.

¹⁷ Ben kpwaake le no me nto mbaa enghan enfey κε, nu ε me nto ηkaake nonen ηgee ε è nu ndvum e? Nu le me ndioo ηkaake fιεε no ηkaake ê je wee wvu fokuse fen wvù beje fιεε le “εε” mum kase tun κε sekedvu le “Aay” e?

¹⁸ Yî kecεεy e, no Nyo' ké no leeme κε yî diεw ye le, κε fιεε fi bese jemyi ê ben ké no nu fi bese ebee le, “εε” kase tun le, “Aay” κε.

¹⁹ ε fí nu nonen njefo κε Jisos Klistu wvù Waa Nyo' wvù bee bo Silas noo Timatio to fewci ê ben ente nu wvù beje fιεε le, “εε” kase tun le, “Aay” κε. ε ké no nu κε le, “εε” sekecii.

²⁰ Ben ekeè le yî Klistu le nu ε boηkawma bò Nyo' gee bocii nu ε wvù ε bee dvú le “εε”. ε nu nje fifin wvù beene fele yî Klistu le gayte ê Nyo' le “Fí enù

nonen.” E nee no beene ké no tumte monkum mew nen.

²¹ E nu Nyo' wvù nu e leke bese e leke ten ben, beene e no temyi yî Klistu le. Wvù nu e caw* beene.

²² Wvù nu e gee nciise we yî yese beene le wvù è nu Keyoy kew kè nu fô mvuntelem mvusee beene le diewe sâ' fi ee ficii fi beene nu ke ekenke le.

²³ E nulo é me mbe Nyo' é wvù eben jim nsaw wem le me nto mbaa nto Kol en e è nu njefo me nto ngomte keembawce lo ben.

²⁴ E ke è nu le bese gomte keeleeme ke le è nee no mbee wene kenke keenu ke. Bese kaa lemte lo beene keeto bô njon fô ben e. Bese kee le ben leeme temyi yî mbee wene le.

2

¹ Nonen e me mum nkpwawce le ke me mbee mbvuu nlaa ghane di eto bô nsase ke.

² E me embvuu ene e nge ben e yuw nsase, é ebvuu enu yee dvù wvù nulo ege é me en'yuw njon efey ben boba bô me nu e nge wase bó e yuw nsase?

³ E nee fi ee fi to gee e me nse nsan nwa' we ê je yî me nto nsanee le. E to nu wvu le me nke ndioo e nto ê ben e, me nsaa nke enkenke nsase wvumu wvù ne fô ben bô bee ege é me en'yuw e è nu njon e ke, njefo me nkee naa ntay ekume ben bocii le njon wem nu ke njon wene bocii.

⁴ Ben ekeè le nwa' wvudvu we nu e me nto nsaanke bô nsase wvu baay, e fitele tone me, e

* **1:21** Kenee le, “... è yefe.” **1:22** 5:5; Lum 8:15-16, 23; Efe 1:13-14
1:23 11:31; 13:2; Lum 1:9; Fili 1:8; 1Tes 2:5; 2Tes 2:10 **1:24** 1Bi
 5:3 **2:1** 12:21; 1Kol 4:21 **2:3** 13:10 **2:4** 7:8; Lem 20:31; 1Kol
 16:24

misem ε yiηsen ê me ejise. E ke me nto nsan nonen keenge é ben eyuw ε è nu nsase ke. E to nu keege é ben ekiε keηkoηen ke baay kè me ηkeηke fô ben e.

Bó elεshε jay mweten enya ê wvú

⁵ E wee to nu ε ge ε me n'yuw nsase, tu ke nsase wvun to meγ ke fô me le ke. Wvú to nu ten fô ben e bocii. (Ke fifin nu fiε fi me enjemyi engene yî dvú le baay ke).

⁶ Ngew wvun wvú wee nteen ben e nu ε nya wase ê wvuwe wee nu ε wvú ε kocen nonen.

⁷ Keseen nu ε è nulo é ben elεshε jay we, ege é fitele fiew elεtene, wvu le fo wvú emey ke wase enu shen shen baay ke.

⁸ Nonen me ε no ηkule can ê ben le ben ekase edunε ê wvú le ben bεε ke koonke wvú.

⁹ E neε fiε fi to gee ε me nse nsan ηwa' we fô ben e keemom ben enkiε le laa ben yuuke ke me le yî fiε le ficii le.

¹⁰ E ben lεeshi jay wee, tu me ten nu ε nleeshε. E me nleeshi fiε, fen é fiε nu dvú keelεshε, tu me nleeshi ê Klistu ejise nje yene.

¹¹ Beene gee nonen wvu le fo Satan ke enε eley jó ekeηke mvunγay ê beene we. Ke beene maa no wvú ké no wεεtene ke.

Diεw Nyo' kumte bonyii le jé le jé le

¹² E to nu seke me nto ηgenεε mbuy kelaante kè Towas e keenfewε saaka wvú jee wvu ekumε Klistu jó, ε Tata yene kembun fô me le keenlem lemme diεw jó.

¹³ Geen en bvufee bwem to baa nu fó ke, njefo me nto mbaa n'yen waa bwem wvù Taytus e jó ke. Non en e me mum ngay bó le le bó e sh ee wase, mum nto Masedonia.

¹⁴ Geen en, keyoone nu fô Nyo' le wvù ké no saa fwe dvusese yí Klistu le nyaa mbeete, e bese bii di ewe bonyii bò wvù nu e kenke gbwen jem e. E wvù mum fele yí yese le sanse Klistu mondvuum e monciim e bó kee wvù yuuke nsam we di ewe jiiin fò bó e ton e.

¹⁵ Ben ekeè le bese nu di ewe nsam jiiin di Klistu le fô Nyo' le entel en jo bonyii bò bó boysee bó noo fô bò laa wase le.

¹⁶ Fô bonyii bò laa wase le nu e nsam wvun too e è nu bò kpwe fô bó le. E bonyii bò bó boyse bó nu e nsam wvun too e è nu bò nshii fô bó le. No fí nu non en, tu è nu ye dvú wvù nu e koc en keege didin lemme?

¹⁷ Ke bese nu di ewe bonyii nteen e bò nu e jo di ew Nyo' yí e tu fi ee fi way e fi bó ghane geese lo ke. Bese nu fisese bonyii bò nu e taash e yí Klistu le. E bese fewci di ew Nyo' bò mvuntelem mvù yuule di ewe bonyii bò Nyo' nu e tum bó, e bó leme ê wvù ejise le.

3

Kenfews en ke monkan mo moyvuum bò mo monf em e

¹ Me nfen ngayte nen e fí nu le bese bvuu kaase dunji lo bikuu bisese ê ben e? Nu le bese shieele

2:13 1Tes 3:1; 2Kol 7:6, 13-14; 8:6, 16, 23; 12:18; Gal 2:1, 3; 2Tim 4:10; Tay 1:4; Lem 20:1 **2:15** 1Kol 1:18 **2:16** 3:5-6 **2:17** 4:2; Fili 1:15-17; 1Tes 2:3, 5, 10; 1Bi 4:11 **3:1** 5:12; 10:12; Lem 18:27

bonɔwa' diewε no bonyii bomew shieele boban bonɔwa' bò nε fô bese le kenεε fô ben e bò dunɔi bonyii bò è nu bese le?

² Ben kebεε nu wase nɔwa' wese wvù bó nu ε san ê mvuntelem mvusese le ε wee tfuu nulo ekiεε ebvuu etaanke.

³ Ben yen'yi le ben nu nɔwa' Klistu ε bese ε seyse. Nɔwa' wvun nu ε ke bó san ε è nu bô kete ke nɔwa' le ke. Bó san ε è nu bô Keyoy ke Nyo' wvù kenke nshii le. ε ke bó san ε è nu yî biwan bi eta yo eta le ke. Bó san ε è nu yî biwan bi è nu mvuntelem mvu bonyii le.

⁴ Fifi nu fiεε ε bese jemyi ê Nyo' ejise se kemanen nje Klistu.

⁵ Ke è nu le bese nu ε kocen bô bikuu bisese keege fiεε fimew wvù bese ke nε eduu le fiεε fimew nε fô bese le ke. ε ge Nyo' bese ε se kocen.

⁶ Wvù nu ε ge bese ε kocen keelemte yî saaka monkan mo monfem e. Ke monkan man yaa nu mò bii ε è nu bonci bò bó sanεε lo bô can ke. ε nu mo Keyoy ke Yuule le. Bonci to too ε è nu bô kpwe. Geenεn ε Keyoy nyaa ε è nu nshii ê bonyii.

⁷ Je yi yvum yî bó to gee mwεεm jó nu ε bó to cow bonci bodvu yî biwan bi eta le. Seke Muses to too bô bonci bodvu nu ε ke bonyii bo Israel to kee keebvuu etaa bvushiw bwew ke, nje n'yuu Nyo' wvù to baa yî bvushiw bwew e. ε yiyε je yi yvum yî to too ε è nu bô kpwe to too kenke n'yuu Nyo', ε n'yuu wvun nu wvù to baa nonen jimte wase kaa gεne lo,

⁸ É n'yuule je yì bó gee mwεεm jó yì è nu yi Keyoy ke Yuule saa efey naa lo wvuwe n'yuule?

⁹ Ε je yì bó to gee mwεεm jó yì to too bô fiεε fi leese lo bonyii ηγεω e, to too bô n'yuule Nyo', κε tu je yì bó gee mwεεm jó yì è nu yì Nyo' joo bonyii le bó nu teyey ê wvú ejise nulo ekeηke n'yuule ε wvú fele lo wvuwe!

¹⁰ Kεceey kedvu nu le fiεε fi to too keηke n'yuule Nyo' fidvu nu ε lase wase n'yuule we njefo n'yuule wvú kuuke fele wvuwe nu ε to wase.

¹¹ Ε fiεε fi to kaa wase gene lo to too bô n'yuule Nyo', κε tu n'yuule fiεε fi too keenu wase kemakaa nu ekuuke fele naa lo wvuwe!

¹² No bese kee nonen se kemaηen, bese ε mum ε no fewci yaa fane ke.

¹³ Kε bese nu diεwe Muses wvú to ké ban bvushiw bwew bô ndvu keege le fo bonyii bo Islael etaale no n'yuule wvú to baa yî bvushiw bwew e jimte kaa gene ke.

¹⁴ Geen en bonyii bodvu nu ε bvufee bvubole to jiime. Ε naa ε to ε buy eben wvun e, nu ε bó dīo taanke fiεε ê ηwa' monkan mo moyvuum e, é bó eyuw, ε fiεε no nu ε fī ε ban κε bvufee bvubole. Ε nu κε yî Klistu le wvú è nulo é bó ecake fiεε fi baanke fidvu.

¹⁵ Yī keceey e, ε to ε buy naa eben wvun e, nu ε bó taanke fiεε ê Nwa' Muses e, ε fiεε no nu κε ε fī ε ban bvufee bvubole.

¹⁶ Geen en é wee ke etu wase bô Tata, é bó mum cake fiεε fi baanke fidvu.

17 Tata wvun nu Keyoy, ε naa fεε fô Keyoy kin nu, nu ε bonyii ke buy κε yî bvunfaw e.

18 Fí nu ε beene bocii bò nu se fiεε bεε baan̄ke monshim mosεεbeene nu ε n'yuu Tata baa yî yese beene le, gee ε beene baa mum kumene gene fwe fwe fieesene wase ε è nu wvú. N̄kumεn wvun nu ε è gee Tata wvù è nu Keyoy ke Yuule.

4

Ntfu saaka wvù jee ê nsháan mbom e

1 Nonεn no bese ken̄ke lemme din ε è cam Nyo' shen ε nya ê bese, tu κε è nulo é shem ekpwee bese dvú κε.

2 Bese nu ε base jim ê mwεεm mvù bonyii gee ê kenyilε le mvù è nu mvu kenshoose le. Bese nu ε tun je ken̄εema. Ke bese leese mbiay ê diεw Nyo' le κε. Bese ké no jemyi κε ε è nu kecεεy endan endan, dun̄ci bikuu bisese ê wee tfuu ê Nyo' ejise, wvu le è nulo é bó ekpwawce ekiεε bonyii bò è nu bese.

3 Ε è cim nu ε saaka wvù jee wvù bese fewci wvun nu ε fiεε banyi, tu fí banyi κε ε è nu fô bonyii bò laa lo le.

4 Fô boba bonyii bò baa bee saaka wvun e nu ε Satan wvù è nu nyo' wvu yî won̄ wvun e ε s̄um bvufee bvubole bvú ε no jiime keege le fo bó eyenè n'yuu saaka wvù jee wvù nu εkumε bvukukε bvu Klistu wvù nu wunte Nyo' le κε.

5 Ben ekeè le κε bese fewci ε è nu εkumε bikuu bisese κε. Bese fewci ε è nu εkumε Klistu Jisos le

3:17 Jon 8:32, 36; Lum 8:2; Gal 5:1, 13 **3:18** 4:6; 1Kol 2:7 **4:1**
 3:4, 6 **4:2** 2:17; 6:4 **4:3** 1Kol 1:18 **4:4** Jon 12:31; Εfe 2:2; Kolo
 1:15; Ibu 1:3 **4:5** 1:24

wvú nu Tata. E bese nu ke lo fisese bonyii bò lemte ben e nje Jisos.

⁶ Nyo' wvù to gayee le,
“N'yu ebuy ê ejiwε le ebaa”,

è nu Nyo' wvudvu wvun wvù nu ε ge n'yu we ε no baa fô mvuntelem mvusese le keeyuuse bese ε bese kee bvukuke bvú Nyo' le bvù nu yî bvushiw bvú Jisos Klistu le.

⁷ Geenεn, ntfu saaka wvun nu yî yese le, ε bese nu ke lo fisese nsháan mbom. E bese nu nonεn wvu le fí edunçi le mvunḡay mvu baay mvun yî yese le nu mvu Nyo' le ε è yaa nu mvusese ke.

⁸ Bonḡεw yike bese biba bicii, geenεn yaa bvuwci bese ke. Bese nen'yi ε bvufee no bvunḡke lo bese, geenεn shem saa ekpwee bese ke.

⁹ Bó ké no bone bikaa ê bese ejim, geenεn ε Nyo' yaa daayi ê bese le ke. Bó ké no kfunε bese ε bese gbwee fokuse, geenεn yaa kpwee ke.

¹⁰ Bese ké no ghane kpwee ke kfuu kpwe Jisos sekecii, wvu le nshii Jisos nulo eyen'yi tən yî ye yese le.

¹¹ No bese cee, nu ε bese ké no nu ke diuw kpwe le sekecii nje Jisos, wvu le nshii Jisos eyen'yi yî binḡkpwe bisese bi ye le.

¹² Nonεn bese ε mum ε no kpwee kpwe, geenεn ε kpwe yese yin too ε è nu bô nshii fô ben e.

¹³ No bese nu ε lese fitele yî Nyo' le diεweε wee mvu wvù to jemyeε ê Nwa' le le,
“Me nu ε mbee ε nse no njemyi”,

4:6 Keḡ 1:3; Yεsa 9:2; 2Kol 3:18; 1Bi 2:9 **4:8** 1:8; 7:5; 11:23-29
4:10 1:5; Lum 6:8; Gal 6:17; Fili 3:10-11 **4:11** Lum 8:35-36; 1Kol 15:31
4:12 Kolo 1:24 **4:13** Mben 116:10

nu ε bese tɛn ε bee ε sɛ no jemyi.

¹⁴ Bese kee lo ɛ wvú wvuwe wvù to bvuseε Tata wesebeene wvù Jisos yî kpwe le, nu ke ebvuse tɛn beene bô nu bô bo Jisos yî kpwe le, ejo bese noo ben tɛn eɛn eɛε ê wvú fwe.

¹⁵ Mwεεm mvun mvunciim kooyi nje yene, wvu ɛ no mbuwma Nyo' saan̄kene ɛne fô bonyii le nteen nteen, é keyoone kè bonyii nyaa ê Nyo' ebiisè, ε mbense ɛne fô Nyo' le.

Mwεεm mvù beene yene mvú le fele lo

¹⁶ Ɛ nεε fiεε fi ke shem kpwee bese kε. Naa no ye yese yin cim bvooke ɛne kaa nɛn, nu ε mvuntelem mvusese kumene tuu kε lo mvunfem εdiuw εcii.

¹⁷ Bon̄ɛw bo caan ban bô bese yene yî kefew kin e, nu ε bó seysee ε è nu bvujon̄ke bvua baay bvù mɛy lo fô bese le bvù è nulo wee saa efewsɛn kε.

¹⁸ Nonɛn, bese baa leke fisese bvufee yî mwεεm mvù bó yene mvú le kε. Bese leke ε è nu yî mvù bó yaa yene le kε, njefo mwεεm mvù beene yene mvú le nu ε mvú fele lo, geenɛn ε mvù beene yaa yene kε, nu mvù mɛy lo.

5

¹ Beene kee ɛ é bó sâw lo cun yin yî è nu ye yesebeene yî beene cee dvú fokuse fɛn, tu beene kɛn̄ke yew fô Nyo' le ε bó yaa bom bô can kε. Yiyε nu yew yî fowe, ε è nu yî mɛy lo.

4:14 1Kol 6:14; Lum 8:11 **4:15** 1:5-6, 11; 9:11, 15 **4:16** Ɛfɛ 3:16
4:17 3:18; Lum 5:2; 1Bi 1:6-7 **4:18** Lum 8:25; Ibu 11:1 **5:1** Job
4:21; 2Bi 1:14

² No beene nu fɛn keseen nu ε beene looci naa shomkene, njefo beene beele baay ε bó etfume yew yi fowe yε yî yese beene le diεwε ndvu le.

³ Ε nu ke enu seke bó ε tfume wase yiyε yî yese beene le, beene saa ebvuu enu ye yε κε.

⁴ No beene bεε cee cun yin e, nu ε bonɔεw bò beene joo gee ε beene shomkene baay. Kε è nu ε beene gomte ε bó baayε ndvú yì è nu ye yesebeene yidvu yî yese beene le κε. Beene gomte ε bó etfume lo yimi yî yese beene le wvu ε nshii wvù mεy lo emi lo binjkwε bi ye le bidvu.

⁵ Nyo' nu wvù nu ε seyse beene keekεηκε fiεε fin. Wvù nu ε nya beene sâ' wvudvu ε è nu Keyoy ke Yuule.

⁶ Nonεn, bese ε mum ε no nu sekecii kee fifin sε kemaηεn. Bese kee ε no bese cee yî ye yin e yî wonj wvun e, nu ε bese nu ncejole fô Tata le.

⁷ Bese gee mwεεm ε è nu nje fitele fi bese lese yî Nyo' le, κε è nu nje bese yεne wvù le κε.

⁸ Bese nu naa sε kemaηεn yî fifin e, ε fí jee naa lo ε bese ecinε lo ye yin e, egeη enu wase bee bo Tata fô la diew e.

⁹ Fí ε no nu ε kenεε bese nu bee bó fô la diew e, kenεε bese bεε fɛn, tu fiεε fi bese taale yî dvú le, nu κε keegeε ε wvù yuuke njonj.

¹⁰ Ben ekeè ε beene bocii keηke keeke eleem fwe dvu Klistu é wvù esaw beene, wvu ε wee mwaan mwaan ekeηκε nlawma fiεε fi wvù to gee yî ye yin e, kenεε è nu fi jee kenεε fi befε.

5:2 Lum 8:23-24 5:4 1Kol 15:53-54 5:5 1:22 5:7 1Kol 13:12;
 1Bi 1:8-9 5:8 Fili 1:23 5:9 Kolo 1:10; 1Tes 4:1 5:10 11:15;
 Yesa 2:12; Dan 7:9-10; 12:2; Lem 17:31; Lum 2:6; 1Kol 3:13-15; 4:5;
 Fili 3:19; 2Tes 1:7-10

Lemme keegee ε bonyii manci mwεεm bô bo Nyo'

¹¹ No bese kee fiεε fi nu keefane Tata, bese ε mum ε no momte keege é bonyii ekumεn. Nyo' looci naa kee bonyii bô è nu bese naa ntay. Ε me ηkpwaake λε ben τεν kee ntay ê mvuntelem mvunεn e bonyii bô è nu bese.

¹² No bese jemyi nen nu ε κε bese gomte keebvuu ekase eduηci lo bikuu bisεse ê ben κε. Bese nyaa κε ε è nu je ê ben keesaale ye bô bese, wvu λε è nulo é ben ekεηke fiεε fi è nulo é ben etfuse ê bonyii bô bensee bibεεn bô mwεεm mvù bó yεne yî bonyii le εjise, ε è yaa nu mvu fô mvuntelem mvubole κε.

¹³ Ε è nu λε bikuu ghane bese, tu bí ghane nje Nyo'. Ε no nu λε bí leeme fó, tu bí leeme κε nje yene.

¹⁴ Fiεε fi gee ε bese gεne fwe bô fiεε fi bese gee nu keηkoηεn kè Klistu keηke fô beene le. Bese gee nonεn njefo bese nu ε looce ε bee λε wee mwaan to nu ε kpwe fô bonyii le bocii, ε fî mum nu λε bonyii bodvu bocii nu ε kpwe wase τεν.

¹⁵ Wvú to kpwe fô bonyii bocii le wvu λε fo boba bô cee, ebvuu ecee fô bikuu bibole κε. Geenεn λε bó eceè wase fô wvuwε wee wvù to kpweε kase buy yî kpwe le nje bó le.

¹⁶ Nonεn, ε κεw lo nu ε κε bese bvuu taale wee bô bvufee bvuu wee wvu wum e κε. Naa no bese to cim shee taale Klistu ε è nu bô bvufee bvuu wee wvu wum e, nu ε bese yaa bvuu taale wvú keseen ê yiye je le κε.

¹⁷ Fiεε fi nu nu λε, é wee nu ε taashε wase bô Klistu, tu wvú nu wase wee wvu fwε. Mwεεm mvu

5:11 4:2; 6:4; 1Kol 9:22 **5:12** 1:14; 3:1 **5:14** Jon 17:23; Lum 8:35; Gal 2:20; Εfe 3:19; 5:2, 25; 1Jon 3:16 **5:15** Lum 6:3-4; 7:4; 14:7-9 **5:17** Yεsa 43:19; Lum 6:4; Gal 6:15; Εfe 4:24; Mwεεm mvu

mvuyvuum mvunciim nu ε fey wase, ε mwεεm mvunciim ε tu wase mvu mvunfεm.

¹⁸ Fin ficii nu ε è gee Nyo' wvù to kasεε jo beene yî ye le no wvù to mancεε mwεεm beene ε bó fele yî Klistu le. Ε wvù ε nya ê bese lemme keegeε ε bonyii manci mwεεm bô bo Nyo'.

¹⁹ Fì nu le, è to nu yî Klistu le wvù Nyo' to manci mwεεm bô bonyii bo yî wonj wvun e le bó etu bô wvù. Ε wvù fanε yaa ebvuu engoyte fite fi kebefε kebole kε, mum nya ntum keman wvun can yese le le bese eteete ê bonyii.

²⁰ Bese ε mum ε no nu fεn yî bvudvuu bvu Klistu le, ε Nyo' fele yî yese le lεke bonyii. Nonεn bese kule can ê ben ê diee di Klistu le le ben ekase emancε mwεεm ben ε bo Nyo'.

²¹ Ε nu nje yese beene wvù wvù wvù Nyo' to geε ε Klistu wvù to baa kee kebefε, nε tu kebefε, wvu le beene etu teytey ê Nyo' ejise nje ye.

6

Bonjεw bô Baul wvù waa ntum Jisos Klistu to yεne

¹ No bese lemte yî kentaashε le bee bo Nyo', bese ε mum ε no kule tεn can ê ben le fo ben efiisεn mbuwma Nyo' wvun ege é wvù ela εcici kε.

² Nyo' to nu ε jeme ê N'wa' we le le, “Kefew ke leη to nu ε to kocεn, ε me nya bitem ê wo. Diuu di mboyma le to nu ε kocεn ε me nfi wo.” Ben etaa eyεn, keseen nu kefew ke leη, ε din nu diuu di mboyma le.

5:18 Lum 5:10 **5:19** Lum 3:24-26; Kolo 1:20 **5:20** Mat 10:40; Yεsa 52:7 **5:21** Jon 8:46; Lum 8:3; 1Kol 1:30; Gal 3:13; Ibu 4:15
6:1 Lum 5:2; 1Kol 15:10 **6:2** Yεsa 49:8; Luk 4:19-21

³ Kε bese yaa gee naa lo fiεε fi nulo ebaanke je wee mvu κε. Bese gee nonen wvu λε fo bó ke eyen jay mvu le yî lemme disese le κε.

⁴ Geenεn, bese nu ε duηce fisese bikuu bisese ê jé le yicii λε bese nu bonyii bo lemme le bo Nyo' le. Bese nu ε duηce ê je yî bese kuule fitele naa baay yî bonγεw bò bese yene le bô seke mwεem temyi noo seke je yaa nu naa dvú κε le.

⁵ Bonyii ké no suunke bese, ké nε sekemew lese bese yew ncaw e, ε bonyii nen'yi no shiike mvun-laa bee bó. Bese ké no kfune ye yî lemme le, ké nε ce entan saa lefe κε, ké nε kefew kemew e no kpwee jen.

⁶ Bese duηci ten λε bese nu bonyii bo lemme le bo Nyo' le ê je nce wese wvù yuule le bô no bese kee fiεε fi ekumε Nyo', noo no bese kuule shém, bô no bese kenke mvuntelem mvù jee fô bonyii le. Bese cee bii no Keyoy ke Yuule duηci, ε bese koonke bonyii bô ηkonen wvu keceey.

⁷ Bese ké no jemyi κε ε è nu njeme wvu keceey, gee mwεem ê mvunγay mvu Nyo' le. Bese ké no jici nce wvu teytoy e diεwε mwεem mvu jem e mvu εbo εceey bô mvu εbo ηkonko le.

⁸ Bese ké no lemte κε lo, kenεε bonyii wvumte bese, kenεε bó yaa wvumte κε, kenεε bó jemyi mwεem mvù befe ekumε bese kenεε bó jemyi mvù jee. Bonyii ké no joo bese λε bese nu bonyii bo kenλεma le, geenεn ε bese nu bonyii bo keceey e.

⁹ Ε bonyii ké nε no nu nen diεwε κε bó kee bese κε, geenεn ε bonyii kee naa bese ntay. Bó ké nen'yi

no yene le bese nu wase bonkfusay, geenen ben etaa eyen, bese nu ke dvú. E bonyii ké ne no nyaa ηgew ê bese, geenen yaa yuwyi bese ke.

¹⁰ Bese ké no nu nen diewe bonyii bò nu yí yii le, geenen lanlanje ke sekeci, nu diewe bonyii bò fuute le, geenen gee ke e bonyii nteen nu bonyii bo kpaw e. Bese ké no nu nen diewe ke bese keηke naa lo fiεε ke, geenen e bese keηke mweem mvunciim.

¹¹ Bonyii bo Kolen, bese nu e jeme wase ê ben yaa nyile fiεε ke. Bese nu e yene mvuntelem mvusese e gee mvuyem ê ben.

¹² Ke bese baa ban mvuntelem mvusese fô ben e ke. E ban ben mvunen fô bese le.

¹³ Me e no njemyi ê ben ke diewe ê boom bem e le, ben ege leηleη no bese nu e ge fô ben e, eyene ten mvunen mvuntelem fô bese le.

Fo wee mbee elenè ekale kemwaan bò wee wvù baa nu wee mbee ke

¹⁴ Fo ben elenè ekale kemwaan ben e bonyii bò yaa nu bo mbee le ke. E nulo é fiεε fi teyey bò fi befē eghan neε se no nu yí fiεε le fimwaan? N'yuu bò εjiwe nulo ekeηke kentaashε?

¹⁵ E nulo é Klistu bò Belial * enu diuw mwaan e? Fiεε fi taashi wee mbee bò wee wvù baa nu wee mbee nu la?

¹⁶ Yew ncese Nyo' nulo ekeηke la keege bò mvunyo' mvu yí won wvun e? Ben ekeè le beene

6:10 7:4; Lum 5:3; 12:12; 8:9; Fili 2:17; 4:12-13; 1Tes 1:6 **6:13** 1Kol 4:14 **6:14** 1Kol 6:9-13; 10:21; Efē 5:5-11 * **6:15** Belial wvun nu dewle. **6:16** Lew 26:12; Yeli 31:33; 32:38; Esek 37:27; 1Kol 3:16

nu yew ncese yì yi Nyo' wvù kεηke nshii. Fifin nu no Nyo' to gayεε le,

“Me nu ηke encee yî bó le, nlene ê bó εntelen.

Me nu ηke enu Nyo' wvubo,
ε bó nu bonyii bem.”

¹⁷ Nonεn, Tata Nyo' gayte le,

“Ben ebuy ê bó εnte, enù jεεy fô bó le.

Fo ben ekum fiεε fi nnyεn e ke,

é me emum enfiisεn ben.

¹⁸ Me nu ηke enu Icen,

ε ben nu boom bem bò bolemsε noo bò bokεnε.

Fifin nu ε è jemyi Tata Nyo' wvù Kεηke Mvunḡay
Mvunciim.”

7

¹ Nsáa yem shém, no Nyo' nu ε nya bonkawma ban ê beene nen, beene emum ecuke fiεε ficii fi beete bó ye yesebeene noo keyoy kesεεbeene. Beene eyuulè ḡene mεεse no beene cee yî nfan wvù wvu Nyo' le.

ε Baul yuw njoη le bonyii bo Kolεn to nu ε kumεn mvuntelem mvubole

² Ben egεε hvudvuu ê mvuntelem mvunεn e fô bese le. Kε bese nu ε jay fiεε fô wee le ke. Kε bese nu ε lεε wee ke, ε ke bese nu ε fiw wee mvu ke.

³ Kε me njemyi nen le me nsaake lo ben ke. Me nu ε ηgay wase ê ben le ben nu naa lo fitele fisεse, é è cim nu keekpwe kεnεε keenu dvú, tu beene nu enu ke yî kentaashε le.

⁴ Me nu ε ηγεε fitele fiem yî yene le baay. Me ηκηκε kembense ye ke baay εκυμε ben. Fitele fiem λεεtene baay εκυμε ben. Εnte jo bongew bocii bô bese yene nu ε me n'yuuke κε ε è nu njon.

⁵ Naa no bese to leyεε won wvù Masedonia le, bese to baa κηκε nλεεten κε. Bese to κηκε bongew biba bicii. Bonyii to gomte diuw bee bó, ε bese bvuu κηκε nfan ê mvuntelem mvusese le.

⁶ Geenεn, ε Nyo' wvù λεεsee mvuntelem mvu bonyii bô nu yî yii le ke λεεsee mvuntelem mvusese bô nto wvù Taytus to toε.

⁷ Ε κε è to μεγ κε nto we maan wvù to λεεσεε mvuntelem mvusese κε. Ε to nu ten je yî ben to λεεσεε fiew fitele jó. Wvú to nu ε see ê bese le ben shieele baay keeyen me le, bô no ben κηκε yii fô bikuu binen e, noo no ben κηκε shiee fô me le. No me n'yuwεε nonen, mbvuu n'yuw naa lo njon baay.

⁸ Ε è cim nu naa le ηwa' wvù me nto nsanεε fô ben e wε to nu ε ge ε ben no nu yii yii, tu κε me ncim ηkumyi ye κε. Geenεn, ε me nto ηkume κε ye, njefo me n'yene le ηwa' wem wvudvu to nu ε ge ε ben no nu yii yii. Geenεn, ben to nu yii yii κε yî kefew e nen caan.

⁹ Me ε no n'yuuke njon keseen, ε è yaa nu njefo ben to nu ε no nu yii yii κε. Ε nu njefo yii yin to nu ε ge ε ben kumen mvuntelem mvunen. Ben to κηκε yii ε è nu ê je yî Nyo' gomte le. Nonen bese to baa ge fiεε fimew fi befe fô ben e κε.

¹⁰ Ε wee κηκε yii ê je yî Nyo' gomte le, tu fí nu ege é wvú εκυμεν fitele fiew. Ε fifin eto ε è nu bô

mboyma fô wvú le, saa eto ε è nu bô fiεε fi wvú ekumyi ye yî dvú le κε. Geenεn, é wee κεηke yii ê je bonyii bo yî won wvun e, tu yí nu ke eto ε è nu bô kpwe.

¹¹ Ben eyεn le fiεε fi yii yì è nu yì Nyo' gomte nu ε to dvú fô ben e. Ben eyεn no ben nu ε jo mwεεm naa shiee le. Ben eyεn tεn no ben nu ε ge fiεε ficii keedunεε le κε ben κεηke εbo fô fiεε fi befe fidvu le κε. Ben eyεn no fiεε fidvu nu ε ton'yε ben. Ben eyεn nfan wvù ben nu ε κεηke. Ben eyεn shiee wvu baay wvù ben κεηke keeyεn me le. Ben eyεn shiee wvù ben κεηke keege fiεε fi leη. Ben eyεn tεn kfuu ηγεw wvù ben nu ε nya ê wee wvudvu wvù gee jay. Yì fiεε le ficii nu ε ben ε dunεε lo le κε ben κεηke naa lo εbo fô fiεε fidvu le κε.

¹² Nonεn, naa no me nto ncim nsanεε ηwa' wε fô ben e nu ε κε me nto nsan nje wee wvù to gee jay, κεnεε wee wvù bó to gee jay fô wvú le κε. Me nto nsan wvu le è nulo é ben edunεε fô bikuu binεn e ê Nyo' εjise le ben κεηke shiee fô bese le.

¹³ Nonεn fifin nu ε ge shém ε no leεtene bese.

Keebise yì shém yese yì nu ε leεten e, nu ε bese bvuu yuuke njon baay nje njon wvù Taytus yuuke njefo ben bocii nu ε ge fitele fiew ε no nu yì nyεkeey e.

¹⁴ Naa me nto ηké no nsaale wase ye bô ben ê Taytus, ben to baa shoose me κε. Kensaa ye kè bese to ké no saale bô ben ê Taytus nu ε dunεε le è nu ke kecεεy. Ε è nu κε leηleη no fiεε ficii fi bese to ké no jemyi ê ben nu tεn kecεεy.

¹⁵ Wvú wvù Taytus ké kumyi no ben bocii to

yuwεε wvú le, bô no ben to fiisεnεε wvú fane, ciɩŋke, ε wvú bvuu koŋ ben naa fesεn lo.

¹⁶ Me tεn n'yuuke njoŋ njefo me nu ε ηγεε bvufee bwem yî yene le ε ηγεn ε mεse.

8

Ntefe no è nulo é bonyii bo mbee le enyaa nnya ê bonyii bomew

¹ Boom bo bwee wese le, bese gomte le ben ekiεε fiεε fi mbuwma Nyo' nu ε ge fô bintaashe bi bonyii bo mbee le bi ê keba kè Masedonia le.

² Bonγεw bò temyi nu ε mom wase bó baay. Geenεn ε njoŋ wvu baay wvù bó keŋke ε ge bó ε looce ε yene can yibo yicii ê bonyii bomew naa no bó cim nu ê kefufe ke baay ente.

³ Fiεε fi è nulo é me ensee nu le è to kpwaw ke bó le bó enya nnya no mvuŋgay mvubole nu. E bó dīoo nyaa, nya naa fesεn lo.

⁴ Bó to nu ε leke bese naa shiee le le bese enya ke bó je keelese εbo fô lemme din e keetom bonyii bò è nu bo Nyo' le.

⁵ Bó to nu ε ge fiεε ê je yì bese to baa kpwaake le è nulo é bó ege le ke. Bó to nu ε yaw nya bikuu bibole ê Tata, mum nya tεn ê bese no Nyo' gomte.

⁶ Nonεn, ε bese mum leke Taytus le no wvú to nu ε kew wase lemme din ê ben entelen, le wvú emum egen dvú fwe efice ben keemεse lemme dī jee din.

⁷ No ben looci kee mwεεm mvunciim naa ntay, mwεεm mvu ê keba ke mbee le, mvu ê keba ke njeme le, mvu ê keba ke bvufee le, mvu ê keba ke shiee keege fiεε le, noo mvu ê keba ke keŋkoŋεn

kenen e fô bese le, bese ε mum ε no gomte le ben elooce ekiεε ten keeyene can yene yî lemme di jee din e ntay.

⁸ Ke me njemyi nen nyaa ε è nu nci ke. Me momte lo mbii shiee wvù bonyii bomew kenke keege fiεε le keen'yen le kenkonen kenen ten nu ke keceey.

⁹ Ben kee wase fitele fi jee fi Tata wesebeene wvù Jisot Klistu to kenke. Naa no wvù to nu wee bvukuke nu ε wvù to ne tu wee kefufe nje yene, wvu le kefufe kew ege é ben etu bonyii bo bvukuke le.

¹⁰ Yî saaka wvudvu wvun e nu ε me ngomte keenya wem ntefe. Fî nu len le ben bò to kewεε lumbee keege fiεε, ε è yaa nu ke keege fiεε maan ke, ben to nu ten bonyii bò to kewεε keekenke shiee keege fiεε,

¹¹ ben emum egen dvù fwe emese, wvu le ben ke dioo ε mese bii no mvungay mvunen nu, é fi elen ekale kemwaan bô shiee wene wvù ben kenke keege fiεε.

¹² Ben ekeè le é wee kenke shiee keenya, tu Nyo' nu efiisen nnya ye bii fiεε fi mweten kenke keenya le, wvù saa ebii fiεε fi wee baa kenke le ke.

¹³ Ke me ngayte nen le ben nu dioo nyaa keefi bonyii bomew kaa kpwe lo ke. E nu fiεε keege é biba bicii ekenke lenlen.

¹⁴ No ben kenke mwεem keseen ε mvù ffuyte lo, ε bonyii bomew tane, nu ε è nulo é ben efi bó. E bó dioo kenke ten ε mvù ffuyte lo sekekie, ε ben tane, é bó efi ben. Nonen é biba bicii emum ekenke lenlen.

¹⁵ E nu no bó nu ε san le,

“Wee wvù to baanceε baay,
to baa emum ekeηke baay κε.
Ε wee wvù to baanceε κε caan,
to baa emum ekeηke κε lo caan κε.”

Ε bó tum Taytus Kolen

¹⁶ Me nyaa keyoone ê Nyo' wvù nu ε gee shiee wene fô fitele fi Taytus e κε ληληη diewe wvù me ηkeηke fô ben e.

¹⁷ Κε wvù to baa emum ebee keeto ê ben e nje bese to nu ε λeke wvù κε. Wvù too ê ben e yî ηkpawce wvuwe le no wvù to keηke wase shiee naa baay fô ben e.

¹⁸ Bese tumte wvù bô waa bwee wesebeene wvù bó kee wvù enteleη jo bintaashε bi bonyii bo mbee le bicii yî saaka wvù jee wvù wvù ghane fewci le.

¹⁹ Ε κε è meη κε fifie ekume wvù κε. Wvù nu ten wee wvù bintaashε bi bonyii bo mbee le nu ε baa ε wvù eghanè bee bó no bese ghane gee lemme di jee di ekume nnya yin. Lemme din nu keege é bonyii enyaà mbense ê Tata keβεε, bô keeduηce ε bese keηke shiee keefice bonyii bomew.

²⁰ Bese gomte ε fo fiεε ke enu dvù fi wee mvu ke ebace bese yî dvù le ekume nnya yi baay yin yi bese lemte yî dvù le κε.

²¹ Bese momte naa ntay keege ε è nu fiεε fi nu λη ε è yaa meη κε ê Tata ejise maan κε. Bese momte keege fi nu ten λη ejise jo bonyii.

²² Bese tumte ten waa bwee wesebeene mvu bô bó wvù bese nu ε mom wase wvù bokanη nteen yî mwεεm e nteen, ε yeη ε wvù keηke shiee keege mwεεm. Ε wvù nu keseen keηke naa shiee wvu

baay fô ben e, njefo wvú nu ε γεε fitele yî yene le naa baay.

²³ Wee diεwe Taytus e nu ε wvú nu wee wvù bee wvú le ne yî ekale le kemwaan, nu ten wee wvù bee wvú lemte yî fiεε le fimwaan fô ben e. E dioo tu fô boom bo bwee wesebeene le bomew ba, nu ε bó nu bonyii bo ntum e bo bintaashε bi bonyii bo mbee le. E nu bonyii ε bó gee ε mbense gene fô Klistu le.

²⁴ Nonen, ben emum eduηce kenηkonen kenen fô bó le endan, wvu le bintaashε bi bonyii bo mbee le eyen le ye yî bese ké no saale ekumε ben nu yi len.

9

Nyo' koonke wee wvù nyaa nnya ye bô nlanlan

¹ Ke shiee cim nu dvú wvù me ensaanke lo ê ben ekumε lemme din keetom bonyii bò è nu bo Nyo' le ke.

² Me ηkee lo le ben kenke wase shiee keetom bó. E è nu fiεε fidvu fi me nsaale ye dvú ê bonyii bo Masedonia ekumε ben, njemyi le ben bo Akεya nu ε ben to seyse wase ε è bεε lo lumbee keetom. Shiee wvù ben kenke keenya ε mum ε ge ten mvuntelem mvu bonyii le nteen ê bó ente ε ja we.

³ Geenεn, me ntumte boom bo bwee wesebeene le ban fô ben e wvu le fo ye yî bese saale ekumε ben yî saaka wvun e ke ebuy le è nu yi εcici ke. Me ε no ntumte bó wvu le ben enù ε ben ε seyse no me nto ηgayεε le ben nu ke enu.

⁴ Efuw ke nonen, fí ε kooy le bee bonyii bo Masedonia bomew ε ne ε to ε yen ε ben nu se ben nu ε seyse, é kenshoose kedvu enu neε fô bese le, εfey

mvunciim fô ben e bô bese se gεεle bvufee yî yene le?

⁵ Ε nu fiεε fi geε ε me ηkpawwεε le fi nu shiee le le me enλεke boom bo bwee wesebeene le ban le bó esa ke fwe eto ê ben e eseyse nnya yi baay yin ε kefew bεε yî ben to kawεε keenya. Nonεn é nnya yidvu emum enu ε ben ε seyse wase le è nu nnya ε ben nyaa yî ηkoη wvu wene le, ε è yaa nu le bó kamte lo ben κε.

⁶ Ben ekumyî le wee wvù jewyi caan, nu ke egbwele ke caan, ε wee wvù jewyi nteen, nu ke egbwele tεn nteen.

⁷ Wee mwaanη mwaanη ben e keηke keenya no wvù nu ε kpawwεε fô fitele fiew e, yaa nyaa guute lo ye keηεε nyaa diεwε bó kane lo wvù κε. Ben ekeè le Nyo' koonke wee wvù nyaa bô nlanηan.

⁸ Nyo' nulo ebuw ben bô mwεεm mvunciim ege é mvú effuyte lo, wvu le ben ekeηke fiεε ficii sekecii ε fí kocine ben e bocii, é ben emum egeè dilemme dì jee dicii dvú ntay.

⁹ Fí nu no bó nu ε sanη le,

“Wee wvù nyaa nnya nu ε tfuw lo nnya ê bonyii bo kefufe le,

lemme diew dì jee nu ke emεy nu sekecii.”

¹⁰ Nyo' wvù nyaa ηgow ê wee wεε bô mwεεm mvudien ε bó diee, nu ke enya tεn ebvuu ebise ηgow mwεεm mvunεn, ege é nce wene wvù jee eto bô ηgbwele ε wvù duule lo.

¹¹ Nyo' nu ke enya tεn ben bô bvukuke ê jé le yicii keege é ben eyen'yi can yene ntay ê bonyii bomew,

wvu le bonyii enyaà mbense ê Nyo' seke bó ε κεηκε nnya yin can yese le.

¹² Kε lemme dinεn di jee din di ben lemte too ke ε è nu bô mwεεm mvù bonyii bò è nu bo Nyo' le shieele maan ke, dí too ten bô mbense fô Nyo' le jé le nteen.

¹³ Lemme di ben gee din nu eduηce bonyii bò è nu ben, é bonyii emum etumte monkum mo Nyo' le yí n'yuw wvù ben yuuke saaka wvù jee wvu ekumε Klistu wvù ben tomte le. Bó nu ke etumte ten monkum mo Nyo' le no ben nu ε yene can yene fô bó le noo fô bonyii bomew e bocii.

¹⁴ Bó nu ke ebunlee fô ben e, ε mvuntelem mvubole nu yí yene le naa baay nje mbuwma Nyo' wvun wvù nu yí yene le wvù kuuke naa fele lo.

¹⁵ Beene enyaà keyoone ê Nyo' yí nnya ye yi baay yi è nulo wee saa esee no yí nu le ke.

10

ε caw Nyo' Baul ε wvù enù waa ntum Jisos Klistu

¹ Me wvù Baul keβεε, ηkule lo can ê ben ê je kembonεn bô nyεkeey wvù wvu Klistu le. ε nu me wvù bó duu le me ηké ndioo nu keba kemew no ncewcewe lo bô ben, ηké nto wase ê ben εjise, mum mbo.

² Me nlεke lo ben le seke me ε ηke ε nto, fo ben ege é me enε encewcewe beene no me nulo ηke encewcewe bee bonyii bò kpwaake le bese gee mwεεm bii ε è nu ηkpawace bonyii bo yí won wvun e ke.

³ Ε nu kecεεy λε bese cee yî won wvun e, geenεn κε bese yaa tumte jem yese bii no bonyii bo yî won wvun e tumte κε.

⁴ Κε mwεεm mvù bese tumte jem yese dvú nu mvu yî won wvun e κε. Mwεεm mvù bese tumte jem yese dvú κεηκε mvunγay mvù nen'yi fô Nyo' le, keebvuuke mondvuum mò temyi dvú.

⁵ Bese ké no joo mwεεm mvu jem e mvun bvooke bombew bò bonyii beeke dvú, shiwse kembense ye kecii kè baanke fo bonyii ekee Nyo', soo ten bonkpawce bo bonyii le dvú, gee ε bó yuuke wase ε è nu Klistu le.

⁶ Seke ben ε duηce λε ben yuuke wase Klistu le bò mvuntelem mvunen mvunciim, é bese emum enya ηγεw ê wee tfuu wvù bεε temyi εκολε bò Klistu.

⁷ Ben etaa eyen fiεε fi nu ê ben ejise! Ε wee kee naa kecεεy λε wen nu wee Klistu, é wvú no kumyi λε no wvú nu wee Klistu, nu κε ten no bese nu.

⁸ Ε me ncim νε naa ε no nsaale ye nfesene caan nje mvunγay mvù bese κεηκε mvù Tata nyaε keeyoo lo ben dvú, ε è yaa nu keesâw lo ben dvú κε, ken'wuumen saa ekoolle me κε.

⁹ Κε me ηgomte λε fí eyen'yi nen κε diεwe me mbεmsee lo ben bò bonwa' bem κε.

¹⁰ Me ηgayte nen njefo bonyii bomew nen'yi no jemyi εκυμε me gayte λε, “Wvú ké no saanke bonwa' ε bó temyi bvuu cewcewe, geenεn seke wvú ε to ê bonyii ejise mum tu wεε. Ε κε njeme we ké no koolle fiεε le κε.”

¹¹ Boba bonyii ekeè λε fiεε fi bese jemyi ê bonwa' le seke bese yaa nu fó κε, nu ε bese nu ke ege fí seke

bese ε to.

¹² Kε bese momte naa keebewsene ye, kεεε efewsene bikuu bisεse bô bonyii bomew ba bô seɲe bô dew yibo fiεε fi è nu bó kε. No bó fewsene bikuu bibole εbonebon, bewsene tεn ye yibo εbonebon, nu ε fí duɲci le kε bó kee fiεε kε.

¹³ Fisεse nu ε kε bese cim saale ye fesene kelenj kε. Bese saale ye ε è nu yî kelenj kè Nyo' nu ε nya can yese le keelem eto ebuy naa ê ben e.

¹⁴ Kε bese danjsene ε è nu kedwee no bese too buyte ê ben e kε. Bese to nu bonyii bo fwe keelen bô saaka wvù jee wvu ekumε Klistu to naa buy ê ben e.

¹⁵ Kε bese saale ye fesene kε, fi nu le kε bese saale ye yî lemme di è ge bonyii bomew kε. Geenεn fiεε fi bese taale fwe kee nu le no mbee wene kuu gεne fwe, nu no kelenj ke lemme disεse le ê ben εntelenj nu ekuuke tεn gεne naa ntay.

¹⁶ Nonεn é bese emum efey lo jo ben efewci saaka wvù jee gεne biba bimew e, saa nu le bese saale ye bô lemme di bó nu ε lem wase bvudvuu bvù wee mvu le kε.

¹⁷ Fí ε mum ε no nu no bó sanj ê Nwa' Nyo' le le,
“Wee edioo esaale ye, no saale ε è nu yî fiεε fi è ge
Tata le.”

¹⁸ Kε è nu wee wvù duɲci ekole kew le wen nu wee wvu lenj wvù mum nu wee wvu lenj ê Tata jise kε. ε nu wee wvù Tata yεne le wvú nu lenj wvù nu wee wvu lenj ê wvú εjise.

11

Baul bô bonyii bô mbiayte le bó nu boom bo ntum e bo Jisos

¹ Me nleke le ben ecine ke é me enjeme njeme keyunse nen caan. Kee, ben ecine ke lo!

² Me nkenke ken'yee ejise bô ben kè è nu ke Nyo' le. Ben nu fô me le diewe ngon kpwoon wvù bee tfu le, wvù me nu e nkaw keenke enya wvù ê diemsen mwaan wvù è nu Klistu.

³ Geen e me nfane le lenlen no yo to weentenee lee Iff, nu e bó nu ke ebvunse ten bvufee bvunen é ben ecine je yì nu keeey bvuu yuule yì ben bii Klistu le jó.

⁴ Me njemyi nen njefo ben kaantene ke lo fi ee ficii. E wee ne e no fewci ekume Jisos mvu jee se è nu wvù bese to fewce è ben, kenee keyoy kemew jee se è nu kè ben to fiisene è Nyo', kenee ekume saaka wvù jee mvu jee se è nu wvù ben to fiisene è bese, tu ben nu emum ekaanten ke lo.

⁵ Ke me nkpwaake le bonyii ba bô ben teje le bokow bo boom bo ntum e bo Jisos e mum kuuke lo fele me ke.

⁶ E è cim nu naa le ke me nkee njeme, tu ke è mum nu le ke me nkee fi ee fi ekume Nyo' ke. Fin nu fi ee e bese e dunce wase è ben è jé le yicii noo yî mwem e mvunciim.

⁷ No me nto nfewce saaka wvù jee wvù wvu Nyo' è ben ecici se nlawma, e fen ghane le me nto nge e è nu kebefee keenshike ekole kem nonen wvu le me embense ben e?

11:2 Efe 5:25-27 **11:3** Kenj 3:1-5, 13 **11:4** Gal 1:8-9 **11:5**
12:11; 1Kol 15:10; Gal 2:6, 9 **11:6** 1Kol 2:6-16; Efe 3:4 **11:7**
12:13; 1Kol 9:12, 18

⁸ Ε nulo é me enḡay le me nto nsoonke ε è nu kenson εντελεη jo bintaashe bi bonyii bo mbee le bimew, no me nto nfii nfi ê bó, nlemte ε è nu fô ben e.

⁹ Seke me nto nu beene, me nto mbaa ηγγεε bvujite bvumew yî wee mvu ben e seke me nto ηκηηke shiee fiεε κε. Boom bo bwee wesebeene le bo Masedonia to nyaa fiεε ficii fi me nto nshieele. Nonen yî fiεε le ficii nu ε me nto ntun keηγγεε bvujite yî yene le. Ε è nu κε no me nu ηke entune nonen.

¹⁰ No keceey ke Klistu le nu yî yem e, κε wee nu dvú ê biba binen bi Akεya le wvù nulo eban diuw wem yî fiεε fi me nsaale ye yî dvú le κε.

¹¹ Me ntune nfi ê ben nonen nje la? Ε nu njefo κε me ηkoonke ben e? Me ηkoonke naa ben ε Nyo' kee nonen.

¹² Fiεε fi me ηgee nu ε me nu ηke emey κε ηgee, wvu le me embaanke je fô bonyii ba bò gomte keeyene le bó nu lenlen bee bó yî fiεε fi bó saale ye yî dvú le.

¹³ Ke bonyii bodvu ba yaa nu boom bo ntum e bo Klistu le bo keceey κε. Bó nu bonyii bo lemme le bo kenεema le. Bó τεεke lo Klistu fô jise le bowen nu boom bew bo ntum e.

¹⁴ Ε κε fifin yaa nu fiεε fi ηghaw e κε. Naa Satan bô ekole kew ke tew κε Nyo' fô jise le wen nu nceendaa we wvu n'yu.

¹⁵ Nonen κε è nu fiεε fi diuw wvù yumεen e seke bonyii bew bo lemme le banse ten ye yen'yi diewe bonyii bò yeeyi bonyii no nce wvu teytey keηke

keenu le ke. Kemese kebole nu ke enu ke lenlen no gee dibole nu.

Ɛ Baul no saale ye ekumε bonjεw bò wvú to yene

¹⁶ Me ε mbvuu ε no njemyi le fo wee ejo me le me nu keyun ke. Geenεn é ben jo me le me nu keyun, é ben cinε le me le ε me njeme ten njeme kensaa ye caan.

¹⁷ Fiεε fi me njemyi ekumε fi fi me nsaale ye yi dvú le se nfan, nu ε ke me n'yaa njemyi bô mvun gay mvu Tata le ke. Me njemyi ε è nu diεwε keyun e.

¹⁸ No bonyii nteen saale ye ê je bonyii bo yi won wvun e, tu me nu ensaalè ten yem ye.

¹⁹ Me njemyi nen njefo ben fiisene biyun duu le ben kenke bvufee!

²⁰ Ben nu ε cinε le bonyii ejoð ben ε ben tuu bonfaw bobole, ε bó diekene yi yene le, bene yi yene le, bensee ye, tumyi can ê ben jise.

²¹ Ken'wuumen koole me le bese to kaa nu fisese biwelencoy fanε yaa gee nonen ke!

Geenεn é fiεε nu dvú fi wee momte keesaale ye dvú, tu me ten nu emomte keensaale ten ye yi fifiε fiεε le. Me mbεε ke njemyi fin diεwε keyun e.

²² Ɛ bonyii bodvu nu Bo'ibulu, tu me ten nu ke mvu. Bó é no nu bonyii bo Islael, tu me ten nu ke mvu. Bó é no nu bonyii bo ê kfuu di Aba'am e, tu me ten nu ke mvu.

²³ Ɛ bó fen nu bonyii bò lemte Klistu le, tu me nfele naa lo bó yi fifiε le. (Me njemyi wase fin diεwε wee jewte le.) Me nu ε nlem naa wase ε nfey lo

bó, ε ηγεν ncaw ε nfey bó, ε bó sun wase me bokaη ηkuuη, ε kpwe ε soy wase me bokaη e bokaη e.

²⁴ Me nu ε nfi wase bongbwan can Bojuu le bokaη botin, ε bó tamte kaη mwaan ε è fuute ηgbwan mwaan fô mbaanyε.

²⁵ Bó nu ε sun wase me bokaη botete bô bimban, ε tumyε me bô eta kaη mwaan. Nguw wvu ê joo nu ε sawyε wase bô me bokaη botete, ε me ε nce wase ê joo ε mbuy ε nshe jó.

²⁶ Me nu ε ηghan wase baay, ε mboy fo me enle joo bokaη nteen, ε mboy fo me enkpwe can bocoon e, ε mboy ten fo me enkpwe can bonyii bem bo won e, ε mbvuu ε mboy fo me enkpwe can bitum e, ε mboy fo me enkpwe elaante, ε mbvuu ε mboy fo me enkpwe ηkpwaante, ε mboy fo me enkpwe ê joo yi baay e, ε mboy ten fo me enkpwe can bonyii bô mbiayte le bó nu boom bo bwεεm e yî Klistu le.

²⁷ Me nu ε nlem wase baay ε njimten. Me nu ε nce wase se nyii bokaη nteen. E me nu ε no nu wase jerη noo se joo yî me η'wu. Me nu ε nce wase bokaη nteen se fiεε fidien, ε nce kenton e se ndvu.

²⁸ E keebvuu bise yî mwεεm mvumew e nu ε me nu ke ekuse jo bvujite ediuw ecii nje bonkpawce bô me ηκεηke fô bintaashε bi bonyii bo mbee le bicii.

²⁹ E wee dioo wεεyi, tu me nu en'yuuke ten ε me η'wεεyi. E wee ké ege é wee mvu ege kebefε, tu fi nu esase me baay.

³⁰ E è nu le me ensaale ye, é me ensaalè ε è nu yî mwεεm mvù dunçi le me n'wεεyi lo le.

³¹ Nyo' wvù nu Nyo' noo Icee Tata wesebeene

11:24 Dito 25:3 **11:25** Lem 14:19; 16:22 **11:26** Lem 9:23;
 14:5 **11:27** 6:5 **11:29** 1Kol 9:22; Gal 6:2 **11:30** 12:5; 1Kol
 1:31 **11:31** 1:23

wvù Jisòs wvù mbense nu fô wvù le sekecii σε ηκα, kee lo ε ke me mbiayte lo ke.

³² Ε to nu seke me nto nu Damaskus, ε wee sa' wvù to nu εκuse jo Nfon Aletas ke gay ε bonyii no ceυte kelaante kedvu wvu ε bó ekoo me.

³³ Geenεn ε bonyii ke jo me lese ê ηkaa le, bvuse fô ntoo ketaη e shike εκfun, ε me nse nlemten can ye le.

12

*Mweem diewe bifile le mvù to too fô Baul e bô mvù
Tata to dunçi ê wvù*

¹ Me nu ensaale ke ye ηgene dvù fwe naa no σεw yaa cim nu fó ke. Me nu ηγεν fwe yí mwεem diewe bifile le mvù to too fô me le noo mvù Tata to dunçi ê me le.

² Me ηkee wee Klistu mvu wvù Nyo' to cunεε ben dvù fey lo εbulε γεν ê we εke. * Εben nu wase bilum yuufe ncow binεw no fí to kooyεε. (Kenεε wvù to ben fó bô ye, kenεε σε ye, tu ke me ηkee ke. Ε kee ke Nyo' maη.)

³ Me ηgomte keembvuu mbiinen le, me ηkee wvuwe wee, (kenεε wvù to ben fó bô ye, kenεε σε ye, tu ke me ηkee ke. Ε kee ke Nyo' maη.)

⁴ Nyo' to nu ε cun wvù ben dvù fô bvudvuu bvu njon e bvu Nyo' le, ε wvù yuw mwεem fó ε è yaa nu mvù è nulo é wee esee ke. Ε mvumwe nu mwεem mvù bó baa enya mvuηgay le wee wvu wum ejeme ke.

11:32 Lem 9:23-25 * **12:2** Fofen nu won wvu we wvù binjente bitete.

⁵ Ε nu wee diεwε wvuwε le wvù me nu ensaalè ye bô wvù. Ke è nulo é me ensaale ye bô εkolε kem ke, efey ke le me ensaalè ye ekumε kewεεyε kem.

⁶ Ε è cim nu le me ηgomte keensaale ye ekumε εkolε kem, me nsaa nu keyun ke, njefo fiεε fi me nu enjemyi nu keεεy. Geenεn me nu ε ntun keηγε fifiε, wvu le fo wee mvu ke enε ekpwaake jεεy ekumε me fele fiεε fi wvù yene yî yem e bô fi wvù yuuke ê me ke.

⁷ Geenεn, keege le fo me ηke enε embense ye baay ekumε mwεεm mvu keηghaw e mvun mvù Nyo' to dunεεε ê me, wvù to nu ε tum kfuu biay mi ε yî no bon'yi ye yem. Biay yin to nu nceendaa Satan ε wvù njinsene bô me, wvu le fo me ηke enε embense ye baay ke.

⁸ Ε me ηke mbunle ekumε fiεε fidvu ê Tata mbuy bokaη botete nleke le wvù ecake ke fiεε fidvu yî yem e.

⁹ Geenεn ε wvù tfuse ê me le, “Mvunγay mwem mvù me nu ε mbuw wo dvù nu ε kocεn fô wo le keefii wo, njefo mvunγay mwem ké no lemte yî wee le gene mεεse seke wvù wεεyi.” Nonεn me nu en'yuuke njon mbvuu nsaale ye ekumε kewεεyε kem nfesene lo wvu le mvunγay mvu Klistu le nulo elemtè yî yem e.

¹⁰ Fí ε mum ε no nu le me n'yuuke njon bô kewεεyε kem noo boncun bô bó nan'yi me dvù noo bonγew bô me n'yene noo bikaa bì bonyii bone ê me ejim bô bonγew bô bii me le nje Klistu. Me n'yuuke njon nonεn njefo è nu seke me η'wεεyi, tu sekekiε nu ε me nu emum entemyi.

Shiee wvù Baul to keŋke fô kentaashε ke bonyii bo mbee le ke Koln e

¹¹ Me nu ε nε wase ε ntu keyuŋ! Geenε ε è ge ben me ε nse ntu nonεn. Ε nu ben bò be keŋke keeduŋci wee wvù è nu me. Naa no me mbaa ncim mbuy fiεε le nu ε ke fí mum nu le bonyii ba bò teŋe bikuu bibole le bokow bo boom bo ntum e bo Jisos e mum kuuke fele me ke.

¹² Mwεεm mvù duŋci mvuŋgay mvu Nyo' le bô biŋghaw bi mwεεm e noo mwεεm mvu diuw wvù yumεεn e nu ε me nto ŋkuu shém baay no ŋgee ê ben enteleŋ. Ε mvumvun nu bonciise bò duŋci le wee nu ceεy ceεy waa ntum Klistu.

¹³ Fiεε fi me nto ŋgee fô bintaashε bi bonyii bo mbee le bimew e nshεete ben efey le me nto mbaa ŋgeεle bvujite bvumew yî yene le, nu la? Ben eleεshε jay wεm fofε!

¹⁴ Ε nεε me wvun, ε me ε nseyse wase keento ê ben e yî bokaŋ e botεte. Ε ke me nu ŋke ento enu bvujite bvumew fô ben e ke, njefo ke me ŋgomte ε è nu mwεεm mvunεn ke. Me ŋgomte ε è nu ben. Me ŋgomte ε è nu ben njefo ke è nu boom bò keŋke keegeεle mwεεm ê bo'icee bobole bô bobwee bobole ke. Ε ké no gεεle bocee boom bô bobwee boom mwεεm ê boom bobole.

¹⁵ Me nu ŋke en'yuuke naa njoŋ baay keenjewse fiεε ficii fi me ŋkeŋke fô ben e bô keenya noo εkolε kem nje ben. Ε me ŋkooŋke ben baay, é ben kaa ekoŋke me caan e?

¹⁶ Ben nu ε yen keceεy le ke me nto mbaa engeε bvujite yî yene le ke. Geenεn bonyii ε no duu le me

nto nu ε n'wεentεn nλεε ben bô mbiay.

¹⁷ Nuυ λε wee mvu bonyii bô me nto ntumεε fô ben e to nu ε λεε ben ê diee diem e λε?

¹⁸ Me nto nu ε nλεε Taytus λε wvú eto ê ben e, mbvuu ntum waa bwee wesebeene wε λε bô wvú eto. Taytus to nu ε λεε ben seke wvú to toε le? Bee wvú to baa gee κε mwεεm yî ηkpawwε le mwaan bô yî εkalε le kemwaan e?

¹⁹ Sekemew ε ben kpwaake λε no bese mεy ε no jemyi nεn nu ε bese gomte keetanji lo diuw wese fwe dvunεn. Bese jemyi ε è nu diεwε bonyii bo Klistu le fwe dvu Nyo'. Nsáa yese shém, fiεε ficii fi bese gee fô ben e nu keege é ben ekuu lo.

²⁰ Ε me nfane λε è nεlo é me ηke enε ento en'yεn ε ben yaa nu no me nshieele λε ben enù κε, é ben tεn eyεn ε me n'yaa nu tεn no ben shieele λε me enù κε. Me nfane λε è nεlo é me ηke enε ento en'yεn ε bonyii waale diwaa, ghεεke kenghεw, kenke shém yî ton'yεεn, beele κε ε è nu dew yibo, beete bô εdiee ε bonyii, kunsene mvunjkunsen, bensee ye yî εcici, kenke kembvunse.

²¹ Me nfane λε me nu ηke endioo ε mbvuu ε nto, é Nyo' wεm ege é ken'wuumεn ekoole me, noo λε me nu ηke enu yî yii le nje bonyii bô se gee bibefε diεwε nnyεn e bô nce nnyεn kenjan noo nsake, ε bó nu ε bó baa cinε wase dvú κε.

13

Ε Baul gay ê bonyii bô to gee bibefε le bó eyenè

¹ Fin nu wase bokaŋ bem botete bò me nu ento ê ben e. Nwa' Nyo' gayte le,
 “Ɛ bó lese nsaw wee, tu bó nu eshieele bonyii bofɛɛ
 kɛnɛɛ botete,
 bò eleem jim nsaw wvudvu.”

² Ɛ to nu seke me nto ntoɛ ê ben e yî nto wɛm wvu bokaŋ bofɛɛ le, me nto nu ɛ ŋgay ê bonyii bò to cee nce kebefɛ le, bó eyɛnè. Me ɛ mbvuu ɛ no ŋgayte ê bó noo ê bonyii bocii naa no me mbaa nu ê ben ɛjise le, ben eyɛnè, njefo kefew kè me nu ŋke embvuu ento nu ɛ me n'yaa nu ŋke encam naa lo shen fô wee le kɛ.

³ No ben gomte le me ŋge fiɛɛ fi duŋci le è jemyi Klistu ê ben fele yî yɛm e, tu me nu ɛŋge. Kɛ è nu le wvú wɛɛyi lo keenya ŋɛw ê ben kɛ. Wvú kɛŋke naa mvuŋgay ê ben entelɛŋ.

⁴ Ɛ nu keɛɛy le bó to taa wvú yî kentam e ɛ wvú wɛɛyi. Geenɛn keseen nu ɛ wvú nu dvú ê mvuŋgay mvu Nyo' le. Bese wɛɛyi kɛ tɛn diɛwɛ no wvú to wɛɛyi. Geenɛn yî mvuŋgay mvu Nyo' le nu ɛ bese nu ke ecee bee bó lemte ben e.

⁵ Ben etaa bikuu binɛn eyɛn le laa ben nu yî mbee le le. Ben emom ɛ è nu bikuu binɛn. Kɛ ben yɛne le Jisos Klistu nu yî yɛne le? Wvú nu naa yî yɛne le, é è fɛn baa nu le ben nu ɛ mom bikuu binɛn ɛ yɛn ɛ ben ɛ gbwe.

⁶ Me ŋkee naa le ben nu ke eyɛn le bese baa egbwe kɛ.

⁷ Bese bunlee Nyo' le fo ben ke enɛ ege fiɛɛ sɛ è nu fi lɛŋ kɛ. Kɛ bese yaa gomte le bonyii eyɛne le bese nu ɛ fey mmom wvudvu kɛ. Geenɛn bese

bunlee ε è nu le ben egeè ε è nu fiεε fi leη naa no bese cim yen'yi ke diεwε bese nu ε gbwe wase mmom wvudvu.

⁸ Kε bese yaa nulo egee naa lo fiεε fi kicine keceεy ke. Bese nulo egee ke ε è nu fi tomte lo keceεy.

⁹ Ε διοο nu seke bese wεεyi ε ben tεmyi, ε bese no yuuke njon baay. Bunle yese nu ke le ben eku egeη emεse.

¹⁰ Ε νεε fiεε fi me nsaanηke mwεεm mvun ê ben ε me mbεε se me ε nto, wvu le seke me ε nto, me nsaanηkeηke keenjo mvunηay mvù Tata nu ε nya ê me encewcewe lo dvú yí yene le ke. Mvunηay mvun nu mvù wvú nya le me en'yoo lo ben dvú, ε è yaa nu le me ensâw lo ben dvú ke.

Ngayma Baul wvu fokemεse

¹¹ Keemεεse boom bo bwεεm e, me ηgayte ben e le beene ε shεε wase. Ben eseyse bikuu binen, eyuw ntefe wεm, enù diuw mwaan, eceè yí nyεkeey e, nonen é Nyo' kenηονηen bô nyεkeey emum enù ben ε bó.

¹² Ben egaynηen bikuu binen e, ηηοce ê ηηοce bonyii bo Nyo' le.

¹³ Bonyii bô è nu bo Nyo' le bocii gayte ben e.

¹⁴ Mbuwma Tata wesebeene wvù Jisos Klistu, bô kenηονηen ke Nyo' le, noo kentaashε ke Keyoy ke Yuule le enù ben ε bó bocii.

13:10 13:2; 10:8; 1Kol 4:21 **13:11** Jon 14:27; Lum 15:33; 1Kol 7:15; Εε 6:23; Fili 4:9; 1Tes 5:23; 2Tes 3:16; Ibu 13:20; 1Bi 5:14

13:12 1Kol 16:20 **13:13** Mak 13:11; Lum 8:26, 39; Gal 6:18

**Nwa' Nyo' Monkan mo Monɛm
New Testament in Noone (CM:nhu:Noone)**

copyright © 2011 Wycliffe Bible Translators, Inc.

Language: Noone

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Noone

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
5b12a3f8-7a2a-5b6f-b1da-1bf94b13fc2e